

**Tingkat pengorbanan sempena Aidiladha, kata Najib
Free Malaysia Today
Sept 11, 2016**

Katanya, ambil iktibar daripada peristiwa korban yang dinukilkan dalam Al-Quran yang turut menyentuh soal kecekalan dan keteguhan hati Nabi Ibrahim dan anaknya Nabi Ismail.

KUALA LUMPUR: Datuk Seri Najib Razak mahu umat Islam di negara ini menjadikan Aidiladha kali ini sebagai satu titik tolak untuk terus bermotivasi dan komited dalam meningkatkan mutu serta nilai pengorbanan.

Perdana menteri berkata mereka semestinya mengambil iktibar daripada peristiwa korban yang dinukilkan dalam Al-Quran yang turut menyentuh soal kecekalan dan keteguhan hati Nabi Ibrahim dan anaknya Nabi Ismail.

“Semangat inilah yang perlu kita hayati dalam mengharungi sebuah perjuangan,” katanya dalam perutusan sempena sambutan Aidiladha melalui catatan laman blog www.najibrazak.com.

Najib menekankan ibadah korban bukan sekadar ritual yang berkala tetapi ia juga meletakkan ke dalam jiwa tentang sejauh mana pengorbanan yang perlu dilakukan kepada agama Allah dalam menjalani kehidupan sehingga mampu menyetepikan kepentingan diri dan tuntutan peribadi.

“Pengorbanan memerlukan ketabahan dan ia harus bermula daripada diri sendiri. Inilah yang kita dipelajari daripada sirah Rasulullah yang memberi inspirasi dan kekuatan dalam perjuangan kita dalam membangunkan negara tercinta ini,” katanya.

Najib sekali gus mengajak masyarakat untuk bersama-sama berjuang dan berkorban untuk membina masa depan negara yang lebih maju dan progresif sebagai sebuah negara Islam berteraskan maqasid syariah.

Katanya, beliau dan keluarga berdoa supaya jemaah haji Malaysia di Tanah Suci dapat mengerjakan ibadah itu dengan selamat dan dikurniakan haji mabrur.

“Bagi mereka yang lain, marilah kita menyertai para Hujjaj dengan doa restu, takbir, tahmid dan tahlil di samping melaksanakan ibadah korban dengan menghayati roh pensyariatannya.

“Tidak lupa juga marilah kita sama-sama mengambil peluang hari yang penuh barakah ini untuk mendoakan kesejahteraan dan keselamatan yang bertambah dan berterusan bagi negara kita yang tercinta,” katanya.

Umat Islam di negara ini menyambut Aidiladha esok.

Copyright (C) 2009-2016 MToday News Sdn. Bhd. All Rights Reserved.

Source: <http://www.freemalaysiatoday.com/category/bahasa/2016/09/11/tingkat-pengorbanan-sempena-aidiladha-kata-najib/>